

Editor
Caribbean Speed Printers N.V.
Aruba Bank N.V. Acc. #332668
Caribbean Mercantile Bank N.V.
Acc. #23951903
RBC Royal Bank Acc. #13307728

Operations Manager

Mariette Engelhart

Redaccion

noticia@bondia.com

Pilar Flores (hefe di redaccion)
Angenette Figueero (closer editor)
Leo Maduro
Raisa Montilla
Oriana Geerman

Ehecutivo di Benta

Sulaika Croes
sulaika.croes@cspnv.com
Mark Gomes
mark.gomes@cspnv.com

Aviso y Arte

Sandra Loefstop
Lisa Tromp

Departamento Digital

Juan Luis Pinto

Administracion
accounting@bondia.com

Martha Arteta de Ariza

Distribucion

Jenny Kelly

Coleccion

Evelinda de Cuba - Tromp

Pre Press

Luis Fernando Arenas (Hefe)
Pablo Libre

Press

Roland Schenker (Hefe)
Omar Ramirez
Martin Boekhoudt
Francis Dirksz

Colaboracion

Associated Press
Ret Karibense
Data Key

Afiliacion

Sociedad Interamericana
di Prensa (SIP)

DIRECCION

Adres: Weststraat #22
Tel: 582-7800
Email: noticia@bondia.com
aviso@bondia.com
info@bondia.com
Website: www.bondia.com
Facebook: @bondianoticia
Instagram: bondiaaruba

BON DIA ARUBA ta un corant redacta y imprimi na Aruba y ta obenibel di dialuna te cu diasabra. Ningun contenido por wordo reproduci sin permiso di editor.

Proyecto di monitor Cascabel ta busca pa haya sa con saludabel y grandi e poblacion di Cascabel na Aruba ta

Recientemente Aruba Conservation Foundation (ACF) a anuncia e inicio di nan proyecto di monitor Cascabel di Aruba den colaboracion cu expertonan Jeff Goessling di Eckerd College na Florida y Dr. Matt Cross y su team di The Toledo Zoo na Ohio. Den un entrevista cu Bon Dia Aruba Giancarlo Nunes, Reseachr Conservation Manager na ACF a elabora tocante e proyecto, con el a cuminsa y kico ta e plannan pa continua cu esaki.

Nunes a subraya cu Cascabel ta un topico cu ta hopi importante pa ACF y pa Aruba mes. El a conta cu den añan 80 no tabatin un parke na Aruba ainda. Tabatin plan si pa un parke, pero e no tabata un realidad ainda. E tempo ey algun investigador experto di Merca a dicidi di bin Aruba pasobra nan a tende di e Cascabel di Aruba, cual na Aruba so tin.

E expertonan a bin Aruba, a bay full rond e isla pa papia cu hende y a haya e Cascabelnan na diferente luga, a pinta un mapa di unda nan ta biba, nan a conta cuanto tin, a haci extenso y a bay afo cu e informacion.

Como cu e Cascabel aki na Aruba so por hay'e, y no tin hopi di dje, una bes nan disparce di Aruba e ta bira un especie extinto, pa e expertonan Mericano tabata importante pa busca un manera pa scapa e colebra aki. Nan a busca colebra y a pone chip den nan pa identifica nan y asina por wak informacion di e colebra. E mesun investigadornan aki tambe a crea un programa di criadero na Merca pa den caso nan bay perdi na Aruba nan por trece nan back.

Nunes a sigui conta cu nan a keda den contacto cu e profesionalnan di Aruba di e tempo ey y for di momento cu nan a bin back combersacionnan pa traha un parke nacional na Aruba tabata andando y despues di hopi tempo tur cos a bini hunto y asina a bin Parke Arikok.

Parke Arikok a cuminsa cu algun hende cu tabata interesa den Cascabel cu eventualmente a desaroya den Parke Nacional Arikok, despues a haya un fundacion, a haya



maneho, empleado, y asina a cuminsa crece y a bira e Parke Nacional di Aruba y aworaki tin Aruba Conservation Foundation.

E programa di monitor di Cascabel a stop pa un tempo, esaki, segun Nunes a splica, tabata pa motibo cu e investigadornan bira grandi, a retira y no tabata bin Aruba hopi mas. E momento ey Parke Arikok no tabata cla ainda pa carga full e proyecto di Cascabel pasobra ta un proyecto grandi cu inclui analisis di sanger, analisis di cuero, mester usa cierto aparatonan cu no tin presupuesto pe.

Pa e motibo ey e proyecto a stop pa un tempo te ora cu un stagaire, Jeff Goessling a cuminsa haci su stage na Aruba studia Cascabel y Cododo.



Ora e cientificonan bieu a cuminsa retira e Goessling a termina su estudio y el a keda bin Aruba y studia e Cascabel y Cododo, cu e placa di su instituto na Merca.

Den actualidad, Nunes a indica, ACF tin bon relacion cune, e ta keda bin siña e profesionalnan na Aruba lo e sa pero a yega a un punto como organizacion cu ACF kier cuminsa enfoca atrobe riba e Cascabel pasobra pa algun tempo hende ta papia di Shoco y Prikichi y Lora, y a cuminsa lubida un tiki riba e Cascabel.

Dos aña pasa ACF a acerca e Goessling pa wak si por cuminsa haci algo cu Cascabel atrobe y asina a cuminsa papia di diferente proyecto cu ta posibel y kico ta accesibel

economicamente. Despues di dialogo a bin cu e idea pa haci un proyecto mas simpel posibel, mas economico posibel, pero cu ta duna mas informacion posibel tocante con saludabel e poblacion di Cascabel ta.

Nunes a remarca na final despues di dos aña di preparacion a logra trece tur experto hunto pa cuminsa papia tocante e proyecto di Cascabel y na januari di e aña aki tur hende a bin Aruba y asina a cuminsa atrobe oficialmente cu e proyecto di Cascabel pa purba haya sa con sano e poblacion di Cascabel ta, con grandi e poblacion ta y tambe pa actualisa e mapa di unda e Cascabel ta biba. Aworaki e mapa oficial ta un mapa hopi bieu y ta bisa cu Cascabel ta biba di Bushiribana te cu Vander Piet, mas o menos, pero Nunes a resalta cu papiando hende di Savaneta, di e area mas noord eybanda, nan sa wak Cascabel tambe, pero e mapa no ta muestra esey, kiermen mester actualisa esey.

No tin un cantidad exacto ainda, mirando cu apenas a cuminsa traha riba e proyecto di nobo, pero segun Nunes a indica, e calculacion cu tur experto ta coincide cune ta cu tin alrededor di 200 Cascabel rond di Aruba. Un cifra cu Nunes a resalta nan lo desea pa subi.

Den nos siguiente edicion les mas informacion tocante e Cascabel, con pa atende na momento cu topa un Cascabel y con pa yuda proteha e especie unico aki.